

22/05/2003

Unit khas bantu pengusaha pelancongan

KUALA LUMPUR: Kementerian Kebudayaan Kesenian dan Pelancongan akan menubuhkan unit khas bagi membantu pengusaha pelancongan yang menghadapi masalah penyusunan dan penjadualan semula pinjaman serta kemudahan kredit dengan institusi kewangan dan perbankan.

Menterinya, Datuk Paduka Abdul Kadir Sheikh Fadzir, berkata unit yang diwujudkan serta merta itu bertujuan memastikan institusi perbankan melaksanakan segera keputusan kerajaan dalam Pakej Strategi Baru.

"Saya cuma bimbang, kalau ikut pengalaman yang sudah-sudah, walaupun keputusan telah dibuat kerajaan tetapi pihak bank melengah-lengah untuk melaksanakannya (langkah yang diambil).

"Saya sendiri akan memantau perkara ini," katanya ketika diminta mengulas pakej yang diumumkan Perdana Menteri, Datuk Seri Dr Mahathir Mohamad, semalam.

Pakej itu turut menggariskan langkah khusus membantu sektor perhotelan dan pelancongan yang terjejas teruk akibat keadaan ekonomi dunia yang tidak menentu dan kesan wabak Sindrom Pernafasan Yang Teruk (SARS).